

ამფიბია

გაინტერესებს, სად გაჩნდა სი-
წოწხლე პირველად? ამ კითხვაზე
პასუხს მოწემულ ტექსტში იპოვი.



თურმე პირველი ცოცხალი არსება
წყალში გაჩნდა. ეს მოხდა 600 მილიონი
წლის წინ. ერთ-ერთი ასეთი არსება იყო
ხერხემლიანი ამფიბია. ამის შემდეგ 200
მილიონი წელი გავიდა. და აი, სიცოცხლე
წყლიდან ხმელეთზე გადმოვიდა. აქ ჯერ
მცენარე **აღმოცენდა**. მას მოჰყვა მწერი,
ბოლოს – ამფიბია. სწორედ ამ უკანას-
კნელისგან განვითარდა ხმელეთის ბევ-
რი ცხოველი, მათ შორის, დინოზავრიც.
უფრო გვიან გაჩნდნენ ფრინველები, შემ-
დეგ – ძუძუმწოვრები.

ამფიბიებს წყალშიც შეუძლიათ ცხოვ-
რება და ხმელეთზეც. ზოგი მათგანი
კვერცხს დებს, ზოგიც ნაშიერს ცოცხლად
შობს. თუმცა გასამრავლებლად ყველა
წყალს იყენებს. არცერთ ამფიბიას ქერცლი
არ აქვს, მათი კანი კი რბილი და **ნოტიოა**.
იკვებებიან პატარა არსებებით: მწერებით,
მათი მატლებით, ლოქორებითა და სხვ.
ასეთია ამფიბიების საერთო ნიშნები, თუმ-
ცა მათ შორის განსხვავებაც ბევრია.

დღეს დედამიწაზე 2850 სახეობის ამ-
ფიბია არსებობს. ისინი სამ ჯგუფად იყო-
ფა. ესენია: უფეხოები, კუდიანები და უკუ-
დოები.

უფეხო ამფიბია ჭიას ჰგავს და სრი-
ალებს. მისი სხეულის სიგრძე 1 მეტრს **აღ-
წევს**. აქვს რგოლებად დაყოფილი სხეული
და მგრძნობიარე საცეცები – შეხებისა და
ყნოსვის ორგანო. ამ ჯგუფში შედის 70-
ამდე სახეობა. ერთ-ერთი მათგანია ცეი-
ლონის გველთევზა.

კუდიან ამფიბიათა ჯგუფში 170-ამდე
სახეობაა. მათ რიცხვში არიან ტრიტო-
ნი და სალამანდრა. აქვთ მოკლე ფეხე-
ბი. ზოგი დაცურავს ან დახოხავს, მცირე
ნაწილი კი დარბის. ამფიბია, რომელსაც
ყველაზე გრძელი კუდი აქვს, 160 სმ-ია.

ბაყაყი და მწვანე გომბეშო უკუდო
ამფიბიები არიან. მათ უკანა კიდურები
წინა კიდურებზე ბევრად გრძელი აქვთ და
ხტუნვა-ხტუნვით მოძრაობენ. უკუდო ამ-
ფიბიები სპობენ ბევრ მავნე მწერს ბალსა
თუ ბოსტანში. ამით მათ დიდი სარგებლო-
ბა მოაქვთ ადამიანისთვის.

რომელი ამფიბია გინახავს? რა
გაიგე ახალი მის შესახებ?



ტექსტის გაგება

ყოველ შეკითხვას შეურჩიე თითო სწორი პასუხი.

1 რას ვიგებთ ტექსტის პირველი აბზაციდან?

- ა) რატომ გადმოვიდა ამფიბია წყლიდან ხმელეთზე.
- ბ) რატომ გაჩნდნენ ყველაზე გვიან ძუძუმწოვრები ხმელეთზე.
- გ) როდის გადმოვიდა სიცოცხლე წყლიდან ხმელეთზე.

2 ამფიბია ჰქვია იმ ცოცხალ არსებას, რომელიც:

- ა) ნაშიერებს ცოცხლად შობს.
- ბ) პატარა ცხოველებით იკვებება.
- გ) ბინადრობს წყალშიც და ხმელეთზეც.

3 ამფიბიებს მიეკუთვნება:

- ა) ბაყაყი.
- ბ) ლოქორა.
- გ) მწერი.

4 ამფიბიათა რომელ ჯგუფს მიეკუთვნება ტრიტონი?

- ა) კუდიანების ჯგუფს.
- ბ) უკუდოთა ჯგუფს.
- გ) უფეხოთა ჯგუფს.

5 რომელი წინადადება გადმოსცემს არასწორ ინფორმაციას?

- ა) უკუდო ამფიბიები ანადგურებენ მავნებელ მწერებს.
- ბ) უფეხო ამფიბიების სხეული დაყოფილია რგოლებად.
- გ) ყველა ამფიბია საცეცის საშუალებით შეიგრძნობს.

6 ტექსტის მთავარი მიზანია გაგვაცნოს:

- ა) რა თავისებურებებით გამოირჩევა ამფიბია.
- ბ) როდიდან ბინადრობს ამფიბია ხმელეთზე.
- გ) რა სარგებლობა მოაქვს უკუდო ამფიბიას.



ლექსიკა

1 გაარკვეთ ხაზგასმული სიტყვების მნიშვნელობები.

1. ხმელეთზე მცენარე **აღმოცენდა**.

ა) ამოვიდა. ბ) აყვავდა. გ) გამრავლდა.

2. ამფიბიას **ნოტიო** კანი აქვს.

ა) თხელი. ბ) მშრალი. გ) სველი.

3. სხეულის სიგრძე 1 მ-ს **აღწევს**.

ა) აჭარბებს. ბ) სცილდება. გ) უახლოვდება.

2 რომელია ზედმეტი სიტყვა?

ა) იკვებება. ბ) საზრდოობს. გ) ცოცხლობს. დ) ჭამს.

3 რომელია საპირისპირო მნიშვნელობის სიტყვები (ანტონიმები)?

ა) მავნე – საზიანო. ბ) მცირე – ცოტა. გ) საერთო – განსხვავებული.

გრამატიკა

1 სწორად შეარჩიეთ გამოტოვებული სიტყვები.

1. ----- განვითარდა ბევრი ცხოველი. (ამფიბიისგან / ამფიბიიდან)

2. კუდიანი ----- გამოირჩევა სალამანდრა. (ამფიბიებისგან / ამფიბიებიდან)

2 იპოვე შეცდომები და აღნიშნე X-ით.

☒ ცოცხლათ.

☐ ცოცხლად.

1. ☐ ამას მოყვა.

☐ ამას მოჰყვა.

2. ☐ ამფიბიები არიან.

☐ ამფიბიებია.

3. ☐ ბევრი მწერი.

☐ ბევრი მწერები.



გრამატიკა

3 დაწერე ნიმუშის მიხედვით.

ნიმუში: ის, რასაც აქვს ხერხემალი, არის ხერხემლიანი.

ის, რასაც არ აქვს ხერხემალი, არის უხერხემლო.

1. ის, რასაც კუდი აქვს, არის ----- ის, რასაც კუდი არ აქვს, არის -----.

2. ის, რასაც ფეხი აქვს, არის ----- ის, რასაც ფეხი არ აქვს, არის -----.

წერა

1 ტექსტში ნახსენები ამფიბიებიდან შეარჩიე ერთ-ერთი ცხოველი. გაიხსენე ყველაფერი, რაც მის შესახებ იცოდი ტექსტის წაკითხვამდე და დაწერე სქემის პირველ გრაფაში. შემდეგ შეავსე მეორე გრაფა. შენს ნაწერს დაურთე ნახატიც.

რა ვიცოდი წაკითხვამდე?	რა გავიგე ახალი?
-----	-----
-----	-----
-----	-----

2 წარმოიდგინე, რომ ამფიბია ჰყვება თავის თავზე. შეარჩიე ერთ-ერთი ამფიბია და დაწერე მისი ნაამბობი პირველ პირში.

